

LIGÁRADAN PÁBLO JOUN RÓMANA

Labürüjan Páblo joun títana ligílisi to Rómaboun

¹ Anája áu, Páblo, nabürüjañoun gárada to jun, jugúya lánigu Búngiu ja aganoúbaña ubúругu Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse lálalibei jaba gürígia.

² Sabúdigüda lumúti Búngiu ugánu le lúmagiñé meja binárü jádaangiñe profétagu, bürüwati le jadímurejabei tídan Lerérun Búngiu. ³ Nñubinti asálbaruni ligía woun lídaangiñe Wabúreme Jesucrístu. Gürígia ubouáguna Jesucrístu, Búngiu méme giñe. Queisi gürígia, jádaangiñeti méja lufámilian Urúei Davíd Jesucrístu, ⁴ arufudúati luágu Liraü lan Búngiu láu luweírín miláguru le ladügübei láu lásaaragüdüni Jesucrístu lídaangiñe ouweni. ⁵ Fuleísei lumútiwa Búngiu lídaangiñe Jesucrístu lun loúnajaníwa lídan líri lun wasúbudiragüdün joun gürígia luágu queisi Wasálbaragüle lídan sun fulásu, gayára lámuga jafíñerun luágu, adüga jameíme le lubeíbei. ⁶ Anjúnjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabürüjaña lubeíti jun, jugúya le aganoúbei ubúругu Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua

lun. Ibíja jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírin neteíngiruni Nubúngiute lídaangiñe Jesucrístu juágu, sun jugúya, lugúndun adímurejóuati luágu jafíñen luágu Jesucrístu lídan sun fulásu. ⁹ Áni Búngiu, le únbei nesériwida táu sun nanígi apúrichijei ugánu luáguti Liraü, geféenti luágu luweírin nayúmuragun juágu súnwandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjinün lun níderagunün lídan jafíñen, lúntima derégüdagu jumá, ¹² lun gíñe wíchugun gurásu wádaangua láu afíñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeíbugun lúma Búngiu, queísi naríjini jawáanserun jíbiri afíñetiña lídan burí ámu fulásu. ¹⁴ Lúnti níderaguniña sun gürígia, dándu ja chülüguatiña queísi ja machülaaguntiña, dándu chu táu queísi ibídiougua táu. ¹⁵ Lueígiñe lubeíti noubadina, buséntina gíñe lun napúrichijani ugánu luáguti Wasálbaragüle jun, jugúya le aganouébei ubúrgu Róma.

Lubáfu ugánu lánina asálbaruni

16 Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja afiñebaña luágu, juríu furúmiñe, lárigiñe, ja mámabaña juríu. 17 Arúfuda lumúti ugánu ligía woun ída líña lan larícharaguagüdüniña Búngiu gürígia ligíbugiñe, lun gayáraabei lan lerésibiruniña queísi lánigu. luwúyeri igáburi ligía, láurügü lafiñerúniwa luágu, libijúa. Ítara líña taríñaguni Lerérun Búngiu. “Le gürígia le richáguabei ligíbugiñe Búngiu láu lafiñerun luágu, libíjubei ibágari magúmuchaditi.”

Jadúnrun gürígia ligíbugiñe Búngiu

18 Aríja wamúti láburujan lanárime ligáñi Búngiu siélugiñe jawágun sun gürígia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban. 19 Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun, 20 le marijínbei luágu Búngiu, gayáraati lasúbudirúniwa láu buri cátei le ladügübei. Arijúaali furáangu lúmagiñe lagúmeserun uboú luágu Búngiu lan ligía, luágu giñe Súnti Gabáfu lan ligía lun súnwandan. Gadúnrunjaña lubeíti luágu jaríban, 21 lugúndun láu sun subúdi jamáni Búngiu ítara, míchugugiña inébesei lun queísi Búngiu, meteíngirun jameí. Queísi libídiouniga láu ligáburi jarítangun luágu Búngiu, féridi jamúti murúsun larúgounga luágu Búngiu lé meja jabíjibe. 22 Láu sun aríñaga jamá luágu chu lan jáu, ibídiouguati jáu, 23 lubáragiñe jájuduragun lun Búngiu le weírigubei, le moúwedadibe, jájuduragarüga joun jayáwa gürígia

ja goúwedaditiña, lúma gíñe joun jayáwa dunúru, jéwe jáma anímaalu ja gádürügua tugúdi.

²⁴ Ligía ígira láaña lubeí Búngiu láu luríban ayúmajani le gádaanbaliña, darí lún buri jadügün cátei buri nibúsigarídünati jámagua. ²⁵ Ítara líña ligáburi jabágaridun lugúndun mafiñerun jamá luágu inárüni luáguti Búngiu, jafiñera luágu iyéeni, jájuduragua láu inébesi lún buri cátei le ladügübei Búngiu lubáragiñe jamúga jájuduragun lun Búngiu, le gadúnabei inébesi súnwandan. Ítaralá.

²⁶ Ligía ígira láaña lubeí Búngiu lun jadáagun cátei nibúsigarídünati, ásta würiña adáagutiña cátei jáma würiña jáledi lubáragiñe jamúga jagámaridun wügüri queísi lubúdubu. ²⁷ Ítara méme gíñe ígira jamáli wügüriña jayúsurun würiña lun jayúsuragun jóungua. Adáaguatiña wügüriña cátei buri nibúsigarídünati jámagua, ábati jasúfuriruni lafáyeiruaja jawíye jawóugua.

²⁸ Queísiti mabúseerúnjaña lan jíchuguni lilúgaarun Búngiu lun, ígira láañati láu lagübüri jasáminan, lun jadügüni le moún lubei jadügüni.

²⁹ Buin jáña láu sun luwúyeri maríchaü, salúfuri, wuríbani, meménijabuni, iyéreejabúni, gimúgaü, áfarajadi, lanígiwa wuríbu, ayéeraguní, ibíbuni, marásualugu. ³⁰ Adímurejatiña wuríba jawágu jíbiri gürígia, iyéreeguti Búngiu joun,

minébenejabutiña, barüguatiña jóungua, pántatiña. Gachügütiña lun jaságarun iséri buri cátei wuríbati, mabájüdün jamútiña jagübürigu, ³¹ ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdemejaabutiña.

³² Subúdi jamúti le laríñagubei Búngiu buídu buídu,

subúdi jamúti luágu ja lan adügütí buri cátei le, lúnti lan jóunwen lueígiñe. Láu sun líra, adüga méme jamúti, darí lun gúnda jamá dan l jasáminan, lun jadügüni lee jaríjin ámu güri-gia adügei.

2

Agúseragüdüti Búngiu láu inárüni

¹ Ligía gadúnrun lubeí le adímurejabei luágu le ladügübei ámu, cáteiñein lan, lugúndun dan le ladímurejan luágu wuríbani le ladügübei ámu, líchuguña guánarügü dúru luóúgua, lugúndun líbe méme gíñe cátei wuríbati ligía ladügübei. ² Subúdi wamúti luágu láu lan inárüni lagúseragüda Búngiu dan le lasíadiruniña ja adügübalin buri cátei l jasáminan, lun jadügüni lee. ³ Bugúyati le adímurejabei jawágu ja adügübalin buri cátei wuríbati le, áni ligía méme gíñe badügübei, ¿jarítaguatibu funági luágu beséfuruba lan lueí ligáñi Búngiu? ⁴ ¿Ódi mebéresentibu láu lareíni Búngiu le magúmuchadibei lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun afígounja? ⁵ Derétu banígi, májatibu basáansiruni bigáburi. Ligía abúnja lubeí agánwoundagüda lafáyeija bifígoun lubáme luwéyuri lagúseragüdüti Búngiu dánme liábin lun líchuguni lisíadin le richábei, ⁶ dánme le lafáyeiruni cáda ában según le ladügübei. ⁷ Líchuguba ibágari magúmuchaditi joun ja áluajabalin uweíriguni, inébesei, lúma cátei lé buri magúmuchaditi yágüta siélu láu jadügüni le buídubei súnwandan ya ubouágu. ⁸ Ánjaña sun güri-gia ja magáambadibaña

lun Búngiu, ja májabaña lun jafálaruni linárün Búngiu, jafálarai wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adügübalin le wuríbabei, joun juríu furúmiñe, lúma gíñe joun ja mámabaña juríu. ¹⁰ Ánjeinti joun sun ja adügübalin le buídubei, líchuguba Búngiu uweíriguni, inébesei, lúma darángilaü, juríu furúmiñe, lúma gíñe joun ja mámabaña juríu. ¹¹ Lugúndun ában lan lanügüniña Búngiu sun gürígia. ¹² sun ja afígounjabaña masúbudirunga jamei lilúrudun Búngiu le ledéregerubei joun gürígia lídaangiñe Moisés, jagúserawagüdüba bougudin luei lúrudu ligía, tídiba jawáni máfiougatin. Játi afígounjabaña láu sun subúdi jamáni lilúrudun Búngiu, jagúserawagüdüba láu lúrudu ligía, tídiba gíñe jawáni máfiougatin. ¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadügüni le lubeíbei Búngiu láurügü laríñagun jarítangun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürüñu tídan janígi, arúfuda tumúti janígi líra, áni laríñagubei jarítangun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucrístu, larítaguba luágu sún buri cátei le, ladüga lagúseragüdübei gíñe ásta cátei lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

17 Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüni Bubúngiutebei. 18 Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. 19 Jarítaguatibu búngua luágu gayára lan badúndejan maríjintiña lídoun üma buíti lúma luágu gayára lan bíchugun larúgounga joun ja eíbugubaña lídan lubúriga. 20 Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni üma joun ja isérigiñabaña lídan jafíñen, queísi barítagan luágu ibíja báani sun subúdi lúma inárüni lídan lilúrudun Moisés. 21 Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja? 22 Ánjein aríñaga bubeí luágu moún lumuti lan jagámaridúniwa jámari gürígia maríeitiña, ¿cámegi badügei? Ánjein iyéreegu lubeí cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísín jalígilisin? 23 Pántatibu láu lilúrudun Búngiu, ába bíchugun minébesei lun Búngiu láu magúnfulirun báani. 24 Tinárün Lerérun Búngiu dan le tariñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

25 Adüga jumúti jugúya juríu igáburi le circuncisión lé meja liseíni lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá,

manügünti circuncisión ni cáta jun, queígubeirügü madügüniwa lan. ²⁶ Gürígia ja mámabaña juríu, ánjein jadüga buri cátei le lubeíbei lilúrudun Búngiu, janügüba queísi lánigu Búngiu láu sun merésibirun jamáni circuncisión. ²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalibei circuncisión, ja magúnfulirunbalin Lerérun Búngiu, láu sun jun lan labürüdüwa. ²⁸ Le juríubei le tímatimaati, máma bougudigiñerügü libíti juríu lan, máma gíñe láurügü wadügün cátei le bouguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítagun gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juríu jamá? ¿o cági lubuíduña lerésibirúniwa circuncisión? ² Sarágu, áni gíbeti gíñe lébuna. Furúmiñeti cátei, rulumuti Búngiu lerérun joun juríu. ³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladüga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Tariñajare Lerérun Búngiu.

Babájüdüba queísi richáti lídan le baríñagubei, áni buídubei báfuridun dánme le bagúserawagüdün.

⁵ Ábanya álügüdajani. ánjein seríwi lubeí luríban wagáburi lun larúfuduni luágu richágua lan Búngiu, ¿cábagi waríñaga? ¿Maríchatí funági Búngiu lugúndun larúfuduni ligáñi luágu luríban wagáburi? (Nadímurejañatia queísi gürígia.) ⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdüniña gürígia?

⁷ Ánjein giñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá? ⁸ ¿Lúnti lubeí jamúga ladügün wuríbani lun larijóuniwa le buídubei? Niján cátei le jaríñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasíadirúniwa.

Sun wagía gadúnruntiwa ligíbugiñe Búngiu

⁹ ¿Ída liñági? ¿Buítimaatiwa wagía juríu sügü jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figou. ¹⁰ Taríñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaráanda lan, úati ni ában áluajati Búngiu.

¹² Yuríguaaña súngubei, ñüdünjaña lídoun féridi.

Úati ni ában adügüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagübüri dimúrei le mínsiñeguti

queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jíri gürígia furése
queísi láfarajan lupeísini jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barüti jagáburi gürínguaü lúma igárigu,

¹⁷ áni ibídiñeti üma lánina darángilaü joun.

¹⁸ Marítagungubeítiña luágu lanúfudewa lueí Búngiu.

¹⁹ Subúdi wamúti luágu sun lan le laríñagubei
binádu lilúrudun Búngiu, joun lan ja lábugiñebaña
lúrudu ligía laríñagei, lun jasúbudiruni gürígia
jagía luágu gafígoun jamá. Ítara líña lubeíti,
gadúnrun jamá sun gürígia ligíbugiñe Búngiu,
dándu juríu queísi ja mámabaña juríu. ²⁰ Lugúndun
úabei ni ában eréderuti richágu ligíbugiñe Búngiu
lueígiñerügü ladügüni le lubeíbei lúrudu, lúnrügü
lasúbudiragüdüni lúrudu woun luágu gafígoun
wamá lesériwida.

Lídaangiñe afiñeni liábin asálbaruni

²¹ Guetóti arúfuda láali Búngiu woun ída lúba
lan ligáburi gayára lan weréderun richáguañu
ligíbugiñe bougudin lueí lúrudu lé meja líchugubei
lídaangiñe Moisés. Gayáraati wasúbudiruni líra láu
walíjanun lilíburuna to meme lilúrudun Moisés,
túma jalíburun profétagu. ²² Láu wafíñerun luágu
Crístu, gayára lan weréderun richáguañu ligíbugiñe
Búngiu, áni ában lan ladügüni Búngiu líra joun
sun gürígia, ²³ lugúndun afígounjaaña sun gürígia
áni siñáti lagúndaarun Búngiu jáu. ²⁴ Láu lareíni
Búngiu, resíbi lumútiña sun gürígia queísi lánigu,
mafáyeijaanga jagía luágu, lugúndun fáyeijali Crístu
luágu wafígoun lun gayáraabei lan weréderun
richáguañu ligíbugiñe Búngiu. ²⁵ Adügati Búngiu

lun lébunabei lan ferúdun Crístu láu loúnwen luágu wafígoun, áni lídaangiñe wafiñerun luágu queísi Wasálbaragüle liábin ferúdun woun. Láu loúnwen Crístu queísi afáyeiragülei luágu figou, ába larúfuduni Búngiu luágu úaragua lan áni iyéreeguti figou lun. Ába lachíbuni líta Crístu jafígoun gürígia já meja aganoúbaña lídan dan le sügüjalibei, le uágubei mafáyeijagüdün láañabaña lan, ²⁶ chibá lumuti giñe jafígoun ja aganoúbaña lídan buri dan le, lun larúfuduni luágu úaragua lan, áni sun ja afiñebaña luágu Jesucrístu queísi Jasálbaragüle barü lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan gürígia luágu lubuídun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídun wagúnfulirun lúma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafiñerun luágu Crístu, gumúgua lébuna wanáangun woúngua. ²⁸ Subúdi wamáali lubeíti buídu luágu resíbi láani Búngiu gürígia le afiñeti luágu Crístu queísi gürígia richáguati, mebéresegúnga ánjein gúnfulijali lubeí lúma lilúrudun Moisés lúmoun magúnfulirungili lan.

²⁹ ¿Juríu rügüñanu funági Gabúngiutei Búngiu? ¿Ma funági giñe Jabúngiute ja mámabaña juríu? Jabúngiute giñe, ³⁰ lugúndun ában rügüñein Búngiu, le erésibirubaliña sun gürígia ja afiñebaña luágu Jesucrístu queísi Jasálbaragüle, mebéresenga ligía ánjein resíbi jabálin circuncisión lúmoun merésibirun jamáni. ³¹ ¿Wayúsuruñein lubeíti afiñeni luágu Crístu lun warúfuduni luágu mebégi

lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábati waríñaga luágu Abrahám, le binádu wáguchi, wagía juríu? ² Lun jamúga lueígiñe lan ladügün cátei buíti lerésibirei Búngiu queísi ában güri-gia richáguati, gébunati jamúga lapántajan, máma ligíbugiñe Búngiu. ³ Tariñajare Lerérun Búngiu. “Afiñetí meja Abrahám luágu Búngiu, luágu lafiñen lerésibirei queísi wügüri richáguati.”

⁴ Dan le ladügün güri-gia ában wadágimanu, fáyeiti le libíjubei lebégi luwádigimari, máma edéweejani.

⁵ Ánjeinti güri-gia le asálbaruti lídaangiñe lifígoun láurügü lafiñerun luágu Búngiu le erésibirubaliña gafígountiña, lerésibirubei Búngiu queísi ában güri-gia richáguati luágu lafiñen, anáti líra, edéweejani.

⁶ Davíd guánarügü adímurejati luágu jagúndan güri-gia ja lerésibirubaña Búngiu queísi richáguatiña luágurügü jafiñen, mebéresenga ligía ca lán meja jadügübei. ⁷ Lariñajare Davíd.

Gúndaatiña güri-gia ja ferúduna lubáña Búngiu jaríban, áni chibáwa ligía jafígoun.

⁸ Gúndaati güri-gia le lanügübei Búngiu queísi güri-gia mafígounjaangili.

⁹ ¿Jóunti rügüñein funásan ja erésibirubalin circuncisión, ódi jóunti giñe ja merésibirunbalin? Jóunti sun jawúyeri güri-gia ugúndani ligía. Ariñagaadiwa luágu resíbi láani Búngiu Abrahám queísi wügüri richáguati, luágu lafiñen. ¹⁰ ¿Ída

bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe, lubáragiñe. ¹¹ Lárigiñe larúfuduni Abrahám lafiñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügüri richáguati ladüga lafiñen luágu. Ítara líña gíñe liábin Abrahám lun jáguchibeí lan sun ja afiñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña. ¹² Jáguchi gíñe ja resíbi jamáalibeí circuncisión Abrahám, ja afiñebaña luágu Búngiu queísi lafiñerun Abrahám lúmagiñe lubáragiñé meja lerésibiruni circuncisión.

Gúnfuliti Búngiu láu lerérún

¹³ Aríñagatí meja Búngiu lun Abrahám luágu líchugubei lan uboú lun jáu sun linébaanfaangu queísi jalágaante, máma ladüga lagúnfuliruni Abrahám lilúrudun Búngiu líchugúa dimúrei le lun, ladüga lafiñerun luágu Búngiu, ába lerésibiruni Búngiu queísi ában wügüri richáguati. ¹⁴ Lun jamúga já rügüñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeítí jamúga jafiñerun ja eménigidubaña luágu jafiñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan linárün cátei, mabáfutiña gürígia lun jagúnfulirun lúma lilúrudun, ¹⁵ barürügü lumúti lilúrudun Búngiu ligáñi jawágun gürígia luágu magúnfulirun jamáni. Ánjein le ñí lumuti úa lan lúrudu, úati gíñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun

linébaanfaangu, lúnti méja ábanbei lan edéweejani luágurügüti affíñeni. Mámarügü jóúnti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, jóúnti gíñe sun ja mámabaña juríu áni máma gíñe lábugiñeñanu lúrudu ligía, ába jafíñerun luágu Búngiu queísi lafíñerun Abrahám luágu. ¹⁷ Ligíbugiñe Búngiu, ñübinti lubeíti Abrahám lun wáguchibeí lan sun wagía le afíñebeí luágu Búngiu, queísi tariñagun Lerérun Búngiu. “Adüga náadibu lun jáguchi ban sarágu mútu.” Gabáfuti Búngiu lun ladügüni líra queísi gabáfu lan lun líchugun ibágari joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaü lan ladüga weíyaali lan, weíya tugúya Sára, affíñeti dán meja le lariñagubei Búngiu lun luágu ítara lúba lan jíbe ladügawagun queísi warúguma. Ába lasúseredun ítara lun jáguchibeí lan sarágu mútu. ¹⁹ Meféridirun lumúti lafíñen luágu dimúrei le lariñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru gíñe Sára lun tagáraüdü. ²⁰ Maloúguadunti lafíñen luágu dimúrei le lariñagubei Búngiu lun, weíritimáarügüti lafíñen. ²¹ Rúti uweíríguni lun Búngiu láu ában ichoúruni le tímatimaati luágu gabáfu lan Búngiu lun ladügüni sun le uágubei lariñaga. ²² Ligía lerésibirunbalin Búngiu queísi wügüri richáguati, luágu lafíñen.

²³ Cátei le, luáguti lerésibiruniña Búngiu gürígia luágu jafíñen, mámarügü luágu Abrahám labürüjóua, ²⁴ labürüjóuña gíñe wawágu. Lugúndun luágu wafíñen, resíbi lumútiwa gíñe

Búngiu queísi richáguatiña, wagía le afíñebeí luágu le ásaaragüdübalin Wabúreme Jesúsu lídaangiñe ouweni. ²⁵ Jesúsu le edéregerúabei lun loúnwen luágu wafígoun, ába lásaarun lídaangiñe ouweni lun larúfuduníwa richáguañu ligíbugiñe Búngiu.

5

Niján lébubei weréderun madúnrunga

¹ Queísiti resíbi láadiwa lubeí Búngiu láu wafíñerun luágu, lídaanjadiwa dan lúma, lídaangiñe Wabúreme Jesucrístu. ² Ladüga Crístu, biníwadiwa lubeí láu wafíñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírigun Búngiu. ³ Áni máma rügüñein líra, gúndaatiwa gíñe lídan wasúfurirun ya ubouágu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburi, áni láu líra, gayára lan weménigidun lun gafánraanbadiwa lan lídan luweírigun Búngiu yágüta siélu. ⁵ Áni máburujanbei warüna lurúma eménigini le, ladügübei Búngiu le aríñaga láalíbei woun ladüga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalíbei woun.

⁶ Ladüga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figou le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei. ⁷ Máma cátei ménreengunti lun loúnwen ában gürígia jawágu ámu gürígia, ni íbini lueígiñe ában gürígia le buídubei, láu sun níjein lan gürígia gayáraati jamúga loúnwen

lueígiñe ában gürígia le buíti le tímatimaati. ⁸ Ánjein Búngiu, ába larúfuduni luweírin línsiñejabu woun láu loúnajani Jesucrístu le Liraü lun loúnwen wawágu, láu sún meja gafígonngidiwa lan. ⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei láburujan jawágun gafígonngitiña lídaanme luwéyuri agúseruni. ¹⁰ Lugúndun ánjein ru lubáliwa Búngiu lídan dan lúmagua láu loúnwen Liraü dán meja le láganigídiwa, choúrutimaati luágu lasálbarubadiwa lan le gumúti, luágu Liraü le wínwañubei lúma, siélu. ¹¹ Áni máma rügüñein cátei le, gúndaatiwa giñe lúma Búngiu lídoun buri dan le, lídaangiñe Wabúreme Jesucrístu, le ídaangiñebei lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügüri le gíríbei Adán lebélera figou ubouágun, ába lanügüni figou ouweni lúmagua queísi lafáyeija, ítara líña giñe jóúweguba lubeí sun gürígia lugúndun afígonngitiña súngubei. ¹³ Lubáragiñe meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígonngitiña ubouágu, láu sun úagili lan lúrudu ligía lun gayáraabei lan jadúraaguni. ¹⁴ Láu sun líra, lúmagiñe meja lidáni Abrahám darí lúmoun lidáni Moisés, jilátiña gürígia luágu jafígonngi láu sun máma lan ladüga magáambadi jamá jafígonngi bei queísi ladügüni Adán le magáambadi bei lun lerérun Búngiu lun. Lueígiñe ában oubaü, Adán liyáwa Crístu le lúnbei liábin, ladüga biángubei jagía barütiña som cátei joun gürígia.

15 ¡Ámuñegueinarügü gíñe cátei le janügübei joun gürígia! Barüti Adán ouweni joun sun gürígia láu lafígounjan, ánjeinti Crístu, barüti asálbaruni joun sun gürígia, áni weíriti asálbaruni le líchugubei Búngiu láu lareíni woun lídaangiñe Crístu sügü láu lifígoun Adán. 16 Weíriti gíñe le líchugubei asálbaruni sügü láu le líchugubei lifígoun Adán woun. Ladúgarügü ában figou, chülüti ouweni joun sun gürígia, ánjeinti ladüga louñwen Crístu wawágu, ferúdunawati sun wafígoun le gíbebei, resíbi lumútiwa Búngiu queísi gürígia richáguatiña. 17 Ánjein gabáfu lubeí ouweni jawágu sun gürígia ladüga lidúnrun ábanrügü wügüri —Adán, chou rutimaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei ibágari magúmuchaditi lúma Búngiu, jarúejaba úara lúma Crístu, ladüga ábanrügü wügüri ligía.

18 Ítara queísi líchuguniña Adán sun gürígia lábugiñe lisíadin Búngiu lun jouñwen láu ladügüni le áubei magúndan lan, ítara líña gíñe lagídaruniña Crístu gürígia lábugiñegiñe asíadiruni ligía, rúleí ibágari magúmuchaditi joun láu ladügüni lugúndan Búngiu lun louñwen jawágu. 19 Ladüga lubeíti lumágaambadi ábanrügü wügüri, ñübintiña sun gürígia lun jafígounjaba lan, ítara méme gíñe, ladüga lagáambadi ábanrügü wügüri, gayáraati jayábin sun gürígia lun richágua jamá ligíbugiñe Búngiu.

20 Rúati lilúrudun Moisés woun lun gayáraabei lan wasúbudiruni cátei lan figoubei. Láu sun gíbe lan figou ubouágu, weírítimaabei lareíni Búngiu lun lachíbuni sun figou ligía. 21 Ítarati queísi gabáfu lán

meja figoú lun lanügüni oúweni, ítara gíñe gabáfuti lareíni Búngiu lun ladügüniña gürígia richágua ligíbugiñe, lúma lun líchugun ibágari magúmuchaditi joun lídaangiñe Wabúreme Jesucrístu.

6

Jiláñu wáña lun figoú, wínwañu lun wesériwidun lun Crístu

¹ ¿Cábati waríñaga? ¿Wasígiruba afígounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figoú, ¿ída lubáti gayára lan wasígirun afígounja? ³ ¿Ibídíñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan gíñe ában lúma lídan loúnwen, lun mabáfujali lánme figoú wawágu? ⁴ Láu wabásterun, queísigubeirügü jamúga bunáwa wamá úara lúma Crístu, áni reídeitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe oúweni láu luweírin lubáfu, sarágüda láadiwa gíñe lun iserijali lan wabágari.

⁵ Lugúndun ánjein ñübin wabeí lun lídaanbadiwa lan ában lúma Crístu lídan ában oúweni líbe loúnwen, ítara wába gíñe lídan lásaarun lídaangiñe oúweni. ⁶ Subúdi wamúti luágu dáwagua lan binádu meja wagáburi lúma Crístu luágu gurúwa lun lagünrinchawagún lubáfu figoú lé meja wawágubei, lun merédeediwa lan queísi idámuni esériwida lun figoú queísi wayúbudiri. ⁷ Lugúndun le jilálalibeí, furíjali lídaangiñe figoú. ⁸ Ánjein jiláadiwa lubeí lúma Crístu, gayáraati wafíñerun luágu wabágariduba lan gíñe lúma, ⁹ lugúndun

subúdi wamúti luágu sará lan Crístu ában weíyaasu lídaangiñe ouweni, moúnwendügüyaali, mabáfujali ouweni luágu. ¹⁰ Dan le loúnwenbei Crístu, ába lagúmuchaguagüdüni lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei. ¹¹ Jugúya gíñe, rúgua jumá júngua queísi jiláguaaña lun figoú, áni wínwañu lun jesériwidun lun Búngiu, lídan ában lúma Crístu Jesúsú le Wabúreme.

¹² Ligía, mígira jumá lubeí lun gabáfu méme lan figoú juágu, afósuraün lun jadügüni luríban jayúmajan. ¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadügüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le íchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladüga líra? ¡Siñáti! ¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le

jagáambubei, táu sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara quei meja lidámun jumá sun luwúyeri figoú, guetó lúnti jiábin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéreseguntün meja lun jabágaridun ában ibágari buíti ligíbugiñe Búngiu.

²¹ ¿Ca mejáti cátei buíti lanüğübeí buri cátei ligía jun le áubei buri nibúsigari jumá guetó? Ni cáta buíti, féridi rüğüñein lanüga jun. ²² Ánjeinti guetó, mámaadün lábugiñe lugúmadin figoú, lidámujadün Búngiu, barütiti cátei le arúmani tun janígi lúma ibágari magúmuchaditi jun. ²³ Lugúndun ouweni lafáyeijabei figoú, ánjeinti edéweejani le líchugubei Búngiu woun, ibágari le magúmuchaditi ladüga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdíjabúbei lun lúrudu, subúdi jumáli luágu dán rüğüñein lan wínwangili ában gürígia, ligía lábugiñeñein lan lúrudu. ² Quei jamúga, ában würi to maríeitu, rúlumutu lúrudu lábun lagúmadijan túmari sun dan le wínwangili lan, ánjein ouwe túmari, bougudijaru lueí lúrudu le íchugubarun lábugiñe lagúmadijan túmari. ³ Ánjoun lubeíti agánawa lúma ámu wüğüri sun wínwangili lan túmari, tadüğüña figoú le gíribei adultériu, ánjein ouwe túmari, gidáaru lábugiñegiñe lúrudu

ligía, áni gayáraati tamárieidun lúma ámu wügüri, madügüntu adultériu.

⁴ Ítara giñe jugúya, nidújeñu, láu louñwen Crístu, furíjadün lábugiñegiñe lagúmadijan lilúrudun Moisés queísi würi to jiláali túmari, ába tagámaridun ámu. Guetó, lánijadün Crístu, le saráalibeí lídaangiñe ouweni, lun gayáraabei lan jesériwidun lun Búngiu le gumúti. ⁵ Lubáragiñé meja werésibiruni Crístu, seríwiti meja lilúrudun Moisés lun lagáguduni luríban ayúmajaní wádan, áni ligía cátei le anügüwaliwa lídoun ouweni.

⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le bürüwabei.

Igáburi lánina figoú le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdübalin figoú nun. Ibídiñeti jamúga nun luágu figoú lan lawámadirun jamégen ámu ánjein jamúga maríñagunti lúrudu. “Mawámadirabeí jamégen ámu.” ⁸ Ladüga méme gumádi le, ába lagáguduni igáburi lánina figoú le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figoú. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan,

luágu lídaañadina lan ũma lun férídi. ¹⁰ Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaja. ¹¹ Lugúndun lárügüdün igáburi lánina figóu le nídaanbei lueígiñe lúrudu ligía, ába leyéeragunina lun nadügüni le wuríbabei, ába lanügünina lídoun férídi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úraguati, áni buíti. ¹³ ¿Ligía funásan cátei buíti le anügübalina lídoun férídi? ¡Máma líña! Nifígoun anügübalin neféridirun nun, áni ítara líña larúfuduni luágu figóu lan, láu cátei le buídubei, le méme lúrudubei, lanügana igáburi lánina figóu le nídaanbei lídoun férídi, áni ítara líña larúfuduni lilúrudun Búngiu luágu wuríba lan figóu le tímatimaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügüri garaüwarügüti, alúgurúañu níña queísi idámuni lun lubáfu figóu. ¹⁵ Úati gunfaráanda náani ca lan susérebei nun, madügün numúti cátei buíti le nabúseerubei nadügün, nadügei cátei le iyéeregubei nun. ¹⁶ Ánjein le lubeí mabúseerun nubeí nadügün ligía nadüga, úraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barünaani lúrudu quei cátei buíti. ¹⁷ Mámaadina lubeíti áu adügübalin cátei wuríbati le nadügübei, igáburi lánina figóu le nídaanbei, ligía adügübalin. ¹⁸ Subúdi numúti luágu úa lan ni cáta buíti nídan bougudin lueí Búngiu, áu queísi wügüri garaüwarügüti. Buséntina jamúga nadügüni le buídubei, siñáti nadügüni. ¹⁹ Madügün numúti

cátei buíti le nabúseerubei nadügün, nasígirarüga adügei wuríbati le mabúseerun nubei nadügün.

²⁰ Ánjein lubeíti le lubei cátei le mabúseerun nubei nadügün ligía nadüga, lídan linárün cátei, máma áu le lání Búngiu adügübalin, igáburi lánina figou le nídaangilibei, ligía adügübalin.

²¹ Niján cátei le asúseredubei nun. dan le busén nan nadügüni le buídubei, wuríbati rügüñein nadárira nídan. ²² Lídan nisáminan, jínsiñeti lilúrudun Búngiu nun, ²³ áni aríjatina luágu níjein lan cátei nídan, ageíndaguti lúma nisáminan, cátei ligía, igáburi lánina figou le nídaanbei, le gámabalina adaürüwañu.

²⁴ ¡Fugiábu áu! ¿Cába eséfurana lídaangiñe igáburi lánina figou le nídaanbei, le anügübalina lídoun ouweni? ²⁵ Búngiu gubeirügu, lídaangiñe Wabúreme Jesucristu. ¡Teínqui níña lun Búngiu! Gunfaráanda numúti lubeíti luágu áu lan láu nání nungua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladüga igáburi lánina figou le nídaanbei, seríwirügütina lun figou queísi lidámun.

8

Wabágari lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesúsu. ² Rúlaali Crístu lání Espíritu woun, áni Espíritu ligía, rúti iséri ibágari woun, furígüda láadiwa lábugiñegiñe lubáfu figou le anügüwaliwa lídoun ouweni. ³ Mabáfuti meja lilúrudun Búngiu lun lagídaruníwa lábugiñegiñe lubáfu figou ladüga turíban wanígi, wagía gürígia

garaüwarügütiña. Ába ladügüni Búngiu le lásiñerubei lilúrudun adüga láu loúnajani Liraü ubouágun queísi gürígia garaüwarügüti le gíñe gayáraati lafigounjan (láu sun, mafigounjan lan). Ába loúnwen Liraü Búngiu, le Jesucrístubei, luágu wafígoun, ába lagúmuchaguagüdüni lubáfu figou wawágu láu loúnwen. ⁴ Ladügünbalin Búngiu líra, lun gayáraabei lan wadügüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sífiri Sándu.

⁵ Ja abágaridubaña queísi jagúndan queísi gürígia garaüwarügütiña, luágu rügüñein cátei le lánina ubou jarítagua, ánjaña ja abágaridubaña queísi lugúndan Sífiri Sándu, luágu cátei le lánina siélu jarítagua. ⁶ Dan le jabágaridun gürígia queísi jagúndan, marítagunga jagía luágu Búngiu, barü lumútiña lídoun ouweni, ánjeinti dan le jabágaridun queísi lugúndan Sífiri Sándu, barü lumútiña lídoun íbágarí tímatimaati lúma darángilaü. ⁷ Ja arítagubaña luágu cátei le lánina ubou le, láganiñu Búngiu lugúndan mája jáña, áni siñá ligía jíchaagun jóungua lábun lilúrudun. ⁸ Ligía, ja lubeí abágaridubaña láu jagúndan queísi gürígia garaüwarügütiña, siñáti jadügüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaüwarügütiña, jabágariduña lídan ában lúma láni Búngiu Espíritu, queísi aganoua lubeí jídan. Le úabei láni Crístu Espíritu lúma, máma lánigu Crístu. ¹⁰ Ánjein wínwan lubeí láni Crístu Espíritu jídan, wínwanboun juwáni lun sun dan ladüga tarúfudúniwa richáguañu

ligíbugiñe Búngiu, láu sun loúweba lan júgubu ladüga figou le lídaanbei ubou le. ¹¹ Ánjein winwan lubei lani Espiritu jidan, Búngiu méme le ásaaragüdübalin Jesucristu lídaangiñe ouweni, líchuguba íbágarí iséri lun júgubu le gouwedadíbei, lídaangiñe lani Espiritu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaüwarügütiña. ¹³ Lugúndun ánjaün abágarídarügü queísi jugúndan, queísi gürígia garaüwarügütiña, jefédiruba, mídinbadün siélu, ánjein jáfara igáburi lánina figou le jídaanbei jílagubei, láu lubáfu Sífiri Sándu, jabágaríduba lun sun dan lúma Búngiu siélu.

¹⁴ Sun ja ladúndejabaña lani Búngiu Espiritu, lirájüñü Búngiu. ¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdünün luei láburujan ligáni Búngiu juágun, Espiritu le jerésibirubei, ligía le adügübalün lun lirájüñü jumá Búngiu. Ligía gayára lubei wagúaruni Búngiu Wáguchi. ¹⁶ Geféenti lani Búngiu Espiritu woun luágu lirájüñüjadiwa lan Búngiu. ¹⁷ Áni ladüga lirájüñü wamá Búngiu, garíchatiwa giñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabei luágu Crístu ya ubouágu, gafánraanbadiwa lídan luweírigun yágüta siélu.

¹⁸ Jarítaguatina luágu ni cáta lan le wasúfurirubei ya ubouágu lúmoun uweíriguni le lúnbei wabíjini siélu. ¹⁹ Láuñein sarágu ayúmajani lúma eménigini sun ubou le ladügübei Búngiu, agúrabei dan le lúnbei jerésibiruni lirájüñü Búngiu jalágaante.

²⁰ Níjein mégeiti luágu sun ubouú, máma jamúga ladüga labúseerun, ladüga ítara líña lan labúseeruni Búngiu, ²¹ láu sun líra, súnwandan níjein lan eménigini luágu leséfuruba lan ubouú lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigun lirájüñü Búngiu. ²² Subúdi wamúti luágu chülü lan lúmoun dan le, sun ubouú le ladügübei Búngiu ayájuati láu igárigu camá ában würi to agáridutu. ²³ Áni máma rügüñein ubouú asúfurira, súfuritiwa gíñe, wagía afiñetiña luágu Crístu, láu sun níjeinjali lan Sífiri Sándu wáma queisi lagúmeseraja cátei le lúnbei werésibiruni. Sandítiwa ában ouñwenbun igári, áni agúraba wamúti dan le lúnbei wayábin lun lirájüñüjadiwa lánme Búngiu le tímatimaati, dánme le liséridun wágubu. ²⁴ Ligía lágüdaja wasálbarun. Merésibirun wamágili sun ubuíduni le lúnbei wabíjini queisi lirájüñü Búngiu, agúrabajatiwa werésibiruni yágüta siélu. Ánjein jamúga ibíja wamáaliti sun le lúnbei wabíjini queisi lirájüñü, mébunaali jamúga wagúrabajan. Magúrabajaantiña gürígia jerésibiruni cátei le ibíja jamáalibei. ²⁵ Queíti merésibirun wamágili lubei sun le lúnbei wabíjini queisi lirájüñü Búngiu, lúnti wagúrabuni láu gurásu.

²⁶ Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queisi lubúdubu. Lídan óra ligía, ába líderaguniwa Sífiri Sándu lun waríñaguni luweírin cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri

Sáandu laríñagun wádaangiñe, ába loúnabuníwa Búngiu lugúndun ayúmuraguati Espíritu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanügün buíti woun, wagía le jínsiñejabúbei lun, wagía le wájali lan lun lánigu wamá queísi larítaguni. ²⁹ Lugúndun ja lasúbudirubaña Búngiu lúmagiñe lubáragiñe ladügüni ubou luágu lánigubaña lan, fánrein lumútiña lun ítara jamá queísi Liraü, lun Liraü lan íbugañaü joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírigun queísi lirájüñü.

³¹ ¿Cábati waríñaga luágu buri cátei le? Queísi lueígiñeñein lubei wafúleisein Búngiu, ¿cábagi jabáfu wáganiñu wawágu? ³² Mamájaanti Búngiu lun líchuguni Liraü guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ída lubáti míchugun láani sun líbiri cátei woun queísi líchuguni Liraü woun? ³³ ¿Cági gayáraabei líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasíadiruníwa lun féridi? Crístu guánarügü ouwebei wawágu, ába lásaarun lídaangiñe ouweni, guetó níjein ñun lueígiñe loúnwenren Búngiu Úguchili ayúmuragua wawágu. ³⁵ ¿Cábati gayára lagídaruníwa luei línsiñejabu Crístu? ¿Liyáraabadiwa

funági asúfuriruni, o lénreengúnga, o eíbaajoúni, o ilámaü, o manáanguni, o pelíguru, o ouweni? ¡Uá!
³⁶ Laríñajare tídan Lerérun Búngiu.

Yaráfatiwa lun wounwen bueígiñe ságü wéyu,
 ítara líña jouseruniwa wáganiñu queísi mudún
 anügütiña lun jafarún.

³⁷ Lídan sun cátei le, ibíja wamúti luweírin lubáfu
 Crístu, le jínsiñejabúbei woun, lun wagáñeirun lídan
 sun lénreengúnga. ³⁸ Chóuru numúti lubeíti luágu
 úa lan ni cáta lun lagídaruníwa lueí línsiñejabu
 Búngiu—ni ouweni, ni ibágari, ni ánjeligu, ni
 máfianu, ni cátei le guetóbei, ni le lúnbei liábin,
³⁹ ni le siélubei, ni le ubouágubei, ní buri ámu
 cátei le ladügübei Búngiu—siñáti lagídaruníwa lueí
 línsiñejabu le larúfudubei woun lídan Wabúreme
 Jesucrístu.

9

Anúadaja láaña Búngiu Israelítagu lun lánigu jamá

¹ Inárüni le lúnbei nariñaguni guetó jawágu
 nirásan, áu queísi ában afíñeti luágu Crístu, áni
 meyéejantina, aríñaga tumúti nanígi nun to
 úaraguaboun lúma Sífiri Sándu luágu inárüni lan.

² Weíriti nírun, áni súnwandan níjein lan gáriti
 tídan nanígi jawágu nirásan. ³ Buséntina jamúga
 lun gíñe lábugiñe nan líñaragun Búngiu, díseñu
 lueí Crístu, ánjein jamúga ítara lúba lubeí gayára
 lan jerésibiruni Jesucrístu queísi jasálbaragüle
 lun jasálbarun. ⁴ Linébaanfaangu Israél jagía, áni
 resíbi lumútiña Búngiu queísi lirájüñü. Reídeiti
 meja Búngiu jádan láu sun luweírigun áni rulumuti
 gíñe darádu buri joun lúma lilúrudun lídaangiñe

Moisés. Arúfudati igáburi joun lun jesériwidun lun, ligílisirugu, áni joun laríñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadünamabei lun liñurúniwa líri lun sun dan. Ítaralá.

⁶ Mámata luágu jamúga reidei lan lerérun Búngiu joun ladügawagun Israél magúnfulirunga, ladüga máma sun Israelítagu lánigu Búngiu le tímatimaati.

⁷ Máma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.”

⁸ Arúfuda lumúti líra woun luágu úa lan ni ában liraü Búngiu luágurügü lirásan, ja rügüñanu lirájüñü ladüga jafíñerun luágu lerérun, jagía anügübaña queísi lirájüñü ja tímatimaatiña.

⁹ Lugúndun niján dimúrei le líchugubei Búngiu lun Abrahám. “Niábinba dánme le lachülürün dan ligía, ábame tagáraüdün Sára ában irájü.”

¹⁰ Áni máma rügüñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isáac, ¹¹⁻¹³ áni dán meja le magúriajóungiña, madügüngiña gíñe ni cáta ni buíti ni wuríbati, ába laríñagun Búngiu tun Rebéca. “Lumúsunbei amúleñein le íbugañaü.”

Úraguati gíñe líra lúma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña gufírümawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebéresenga ligía ca lan jadügübei.

¹⁴ ¿Cáhati waríñaga? ¿Waríñaguba luágu múaran

lan Búngiu? ¡Siñáti! ¹⁵ Lugúndun laríñajare lun Moisés. “Gareínibadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerún o wáfaagun, lugúdemejabu Búngiu woun, lídaañein lugúndan. ¹⁷ Tídan Lerérun Búngiu, bürüwañu líña dimúrei le laríñagubei lun urúei Ejíptona. “Nadügünbálibu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégüdalóun lanígi le únti labúseera ledéreragüdünun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladügün cátei bouguditi lueí lugúndan Búngiu?” ²⁰ Wel, ¿cátabuñadíbugi lun balégejan lúma Búngiu? ¿Laríñaguba funági soúdieru lun le adügübalin. “¿Cáme badügana ítara?” ²¹ Garíchati le adáagubei soúdieru lun ladügüni le labúseerun láu lubúñe soúdieru, gayáraati ladügün ában soúdieru le díseguati layúsurun, lúma ában le ayúsurúti lun furúmieguarügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírin ligáñi jawágu gürígia ja gadünabaña jagünrinchawagún. Áfaaga lumúti jaríban láu sarágu gurásu darí guetó ²³ lúnrügü gayára lan larúfuduni luweírin luweírigun woun, wagía le únbaña gudémejabu lan, ja gíñe laráanserubaña lúmagiñe binárü lun gafánraanbadiwa lan lídan luweírigun. ²⁴ Wáti Búngiu woun, jíbiri jádaangiñe juríu, jíbiri jádaangiñe ja mámabaña juríu, ²⁵ queísi laríñagun Búngiu tídan

lilíburun Oséas.

Já meja mámabaña nánigu, naríñaguba joun.
“Nánigu”,

gürígia méja ja mínsiñebaña nun, naríñaguba joun.
“Jínsiñetün nun”.

²⁶ Áni lídan méme fulásu le ñí lubei laríñawagúa
joun. “Máma nánigu jugúya”,
ñíba laríñawagúa joun. “Lirájüñü Búngiu le
wínwanbei”.

²⁷ Ánjeinti jawágu Israelítagu, ja méme juríubaña,
laríñajare Isaías. “Láu sun gíbe jamá ladügawagun
Israel quei ságoun láru béya, biánraürügübaña
jádaangiñe erédera lun jasálbarun, ²⁸ lugúndun
lagúnfulirubei Búngiu lerérun ligíbuagu ubouú lun
lagünrinchaguniña ja magáambadibaña lun, lídan
ában igáburi le gumúti, le gíñe furéseti.” ²⁹ Queísi
méja laríñagun méme Isaías.

Lun jamúga meja mígirun lan Súnti Gabáfu
jádaangiñe wadügawagun woun,
wayábiña jamúga lun itara wamá queísi ubúругu
buri Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámabaña
juríu, ja mibíjínbalin lilúrudun Búngiu lun
jasúbudiruni le buídubei lúma le wuríbabei, jagía
anügübaña quei richáguatiña ligíbugiñe Búngiu
ladüga jafiñerun luágu. ³¹ Ánjañati ladügawagun
Israel, ja áfaagubaña lun jerésibirúniwa queísi
gürígia richáguatiña láurügü jagúnfulirun lúma
lilúrudun Búngiu, siñá jamuti lúrudu ligía agúnfulira,
machülüntiña lun richágua jamá ligíbugiñe Búngiu.

³² ¿Cági uágu? Lugúndun máfaagun jamá lun

jeréderun buídu ligíbugiñe Búngiu luágurügü jafñen, jadügeirüga láu cátei le guánarügü jadügübei. Ligía jachúgeragunbei luágu Jesucristu queísi “dübü le achúgeraguágülei”, ladüga siñá lan jafñerun luágu queísi Jasálbaragüle. ³³ Laríñajare tídan Lerérun Búngiu.

Rútina ában wügüri le queísigubeirügübei dübü le achúgeraguágülei Sión, dübü giñe le eíguadagüdüti gürígia.

Ánjeinti le afñeruti luágu, maságürijanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmuragun lun Búngiu jawágu Israelítagu, ja méme juriubaña, lun jasálbarun.

² Aríñagatina luágu jafúleisein luágu níjein lan ában oúnwenbun gúnfuli jádan lun Búngiu, máma queísi laríñagun subúdi jagúnfulin. ³ Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madügünga jameí le labúseerubei. ⁴ Lugúndun Crístu lébejabei lagúnfulirúniwa lilúrudun Moisés, áni adügati lun sun lan ja afíñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguatiña láu jagúnfuliruni lilúrudun, laríñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.”

⁶ Luáguti lerésibiruniña Búngiu gürígia queísi richáguatiña ligíbugiñe luágu jafñen, laríñajare. “Maríñagabá tídan banígi. ¿Cába amúdeira siélun?”

—queísigubeirügü barárigüdüñein lan Crístu le Wasálbaragüle siélugiñe. ⁷ Maríñagabá giñe. “¿Cába arárira le ñíjin jabeí jiláaña?” —queísigubeirügü bamúdeiragüdüñein lan Crístu jádaangiñe jiláaña ítara. Úati ni cáta lun wadügüni lueídügüya lun wafiñerun luágu. ⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein giñe ugánu ligía tídan banígi.” Ugánu le, elun?” —queísigubeirügü barárigüdüñein lan Crístu le ligía ugánu le lánina afiñeni luágu Crístu le Wasálbaragüle, le wapúrichijabei. ⁹ Ánjabu aríñaga láu biyúma luágu Jesúsu lan Babúremebei, afiñe amürü tídan banígi luágu sarágüda láani Búngiu lídaangiñe oúweni, basálbaruba. ¹⁰ Láu bafiñerun luágu Jesucrístu táu sun banígi, lerésibirabu Búngiu queísi ában gürígia richáguati ligíbugiñe, láu bíchugun fe luágu láu biyúma, basálbara.

¹¹ Taríñajare Lerérun Búngiu. “Úati ni ában gürígia le afiñeruti luágu Jesucrístu lun laságüríjan luágu lárigiñe.” ¹² Ában jáu juríu jáma ja mámabaña juríu, Wabúreme Jesucrístu, ligía Jabúremebei súngubei, áni fuleísei lumútiña sun ja agúarubaña lun lun líderaguniña. ¹³ Ítara líña quei laríñawagún tídan Lerérun Búngiu. “Sun ja aguáruti líri Wabúreme, jasálbaruba.” ¹⁴ ¿Ída lubáti gayára lan jagúaruni lun lasálbaruniña ánjein mafiñerungiña lubeí luágu? ¿Ída lúba giñéti gayára lan jafiñerun luágu, ánjein magáambungiña lubeí luágu? ¿Ída lubáti gayára lan jagáambun luágu, ánjein uá jabeí apúrichijati ugánu luáguti asálbaruni joun? ¹⁵ ¿Ída lubáti giñe

gayára lan japúrichijan gürígia joun ánjein uá cába lan oúnajaña apúrichija? Queísi laríñawagún tídan Lerérun Búngiu. “¡Ma lubuídun jachúlürün ja anügübalin ugánu luáguti aráandaruni lúma Búngiu, apúrichija jamei ugánu buíti luáguti asálbaruni!”

¹⁶ Másutiña gürígia ja agáamba jamáalibei ugánu luáguti asálbaruni ebéresera láu. Queísi laríñaguni Isaías tídan lilíburun. “Wabúreme, míbetiña afíñerutiña luágu ugánu luáguti asálbaruni le wapúrichijabei.” ¹⁷ Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

¹⁸ Ába naríñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Taríñajare Lerérun Búngiu.

Agaambúaali jamálali lídan sun fulásu,
chülújali jerérun lídoun lagúmujoún larígei ubou.

¹⁹ Ába naríñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei laríñajare Búngiu liyúmulugugiñe Moisés.

Naméendidagüdübadün jadüga ában rása ja máma náni,

nagáñidagüdübadün jadüga ában rása ja ibídiñegidina joun.

²⁰ Aríñagati gíñe Búngiu liyúmulugugiñe Isaías.

Darí jamutina ja máluajaanbalina,
arúfudaguatina núngua joun ja málügüdajánbaña nuágu.

21 Ábaya laríñagun jawágu Israelítagu. “Sun wéyu náu agúaja joun gürígia magáambaditiña, mabuídun.”

11

Israelítagu ja sálbabaña

¹ Aríñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín. ² Barü lumútiña Búngiu Israel-ítagu queisi lánigu lúmagiñé meja binárü, guetó, mamájaanti joun. ¿Magáambun jumúti le tariñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmragun lun Búngiu? Laríñaga. ³ “Nabúreme, áfaragua jamá profétagu jilágubei, güríngua jameí buri báni latárü, áu rügáli erédera jádaangiñe bánigu, áni buséntiña gíñe jáfarunina jilágubei.” ⁴ Ába laríñagun Búngiu lun. “Anuádajaadina sédü mílu wügüríña nubárua ja májuduragúngiñabaña ligíbugiñe liyáwa búngiu le Baal.” ⁵ Ítara méme gíñe lídoun buri wéyu le, reídejajaña átiri jádaangiñe juríu ja anúadaja láañabaña Búngiu láu lareíni. ⁶ Ánjeinti láu lubeí lareíni Búngiu lanúadiraña, mámaali láu cátei le liyáraati gürígia guánarügü adúga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afíñeni luágu Búngiu, ába lígiruniña Búngiu

táu tidére janígi. ⁸ Queísi taríñagun Lerérun Búngiu. “Adüga lumútiña Búngiu lun deré lan jachügü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülü lúmoun dan le.” ⁹ Aríñagati Davíd.

Garábagua lámuga jefédujan lun sádarame, lun jáburujan tídown, lun jasúfurirun.

¹⁰ Darú lámuga jágu, maríjin jamámuga, sebúgua lámuga giñe janágan lábugiñe janügün lun sun dan.

Jasálbarun ja mámabaña juríu

¹¹ Nálügüdaaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu. ¹² Ánjeinti seríwi lubei dúru le jadügübei juríu buítme lun uboú, áni ánjein buíti lubei lanügübei jeféridirun joun ja mámabaña juríu, ¡sarágume buídutimaabei lan dánme le jasálbarun sun juríu!

¹³ Níjein giñe ában cátei lun naríñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíríti nubéresen láu nuwádigimari, ¹⁴ lun gayára lan jabúseerun nirásan jáyeijanün, lun giñe jasálbarun. ¹⁵ Ánjein ladüga lubei lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe oúweni. ¹⁶ Ánjein derégewa tubei

furúmiñetu fein to adügütu tídaangiñe fulúwaaru añóundawagutu lun Búngiu, derégewatu gíñe sun fulúwaaru ñóunwaguatu to ídaangiñeboun tiábin fein tugúya. Ánjein gíñe derégewa lubeí tílagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queisi tilímun olívo tímatimaati, chaünwatiña, gidáwatiña jagánaguagiñe lumútuniña Búngiu ladüga mafiñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan tílagüle lúma lídan tibágari olívo, resíbi jugúyame labínirun Búngiu, queisi lumútuniña. ¹⁸ Marítagua jumátia luágu buídutimá jumá lueí límu le ñígubeibei méja. Ánjaün arítagua luágu buídutima jumá, jarítagua jumá luágu máma lan jugúya ágüdajabalin ílagülaü, luágu ílagülaü lan ágüdajabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun mafiñen jamá luágu Wasálbaragüle, jugúya, gabára jubeí ladüga jafiñen luágu. Manáangua jumá lubeíti júngua, duárirügü jumá. ²¹ Lugúndun ánjein úa lubeí ferúduna laniña Búngiu juríu já meja lanúadajabaña lun lánigu jamá, úabei gíñe ferúduna lánün, jugúya le mámabei juríu, ánjaün ñübin lun mafiñen jumá. ²² Aríja jumeí lubeíti luweírin lareídun Búngiu, derégüdati gíñe. Derégüdati joun ja mafiñebaña, areídati joun ja afiñebaña. Lúnti jasígirun lídan lareíni láu sun jafiñen luágu, ánjein madügün jumá

ítara, jagídarúba gíñe. ²³ Ánjaña ñübin juríu lun jafíñerun luágu Crístu, jíchugúayaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járigoún. ²⁴ Jugúya le mámabei juríu, chaünwatün tueígiñe ában olívo to áraabuna, ába jíchugún tuágun olívo to buítu, gúbume ladügüwa joun juríu ja tilímunbaña olívo buítu ja tímatimaatiña, jíchugúayaba járigoún tuágun olívo to ñígiñe lubeí jagídarúa, naríñaguña luágu lachülürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujoún

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálügüdagun júngua luágu buri cátei le. luágu deréraügüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu. ²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Sióngiñe,
ábame lagídarun wuríbani jádaangiñe juríu.

²⁷ Nijánba nidáradun jáma,
dánme le nagídaruni jafígoun.

²⁸ Luágu ugánu le luáguti asálbaruni, barüwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagübürigu juríu. ²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña.

³⁰ Jugúya, magáambaditün meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnrüügü gudémejabu lan Búngiu joun queísi gudémejabu lan jun. ³² Ígira lumútiña Búngiu súngubei lun magáambun jamáni, lun gayáraabei lan gudémejabu lan joun.

³³ ¡Luweírin lareídun Búngiu, lúma lichú láu! Siñáti wasúbudiruni larítapun, siñá gunfaráanda wamáni lémeri. ³⁴ ¿Cági gunfaráandabalin larítapun Búngiu? ¿Cági arúfudajabei lun? ³⁵ ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe? ³⁶ Úati ni ában, lúmagiñe Búngiu liábin sun cátei, ligía gíñe ágüdajabalin sun cátei, áni lúngua gíñe ladúgei. ¡Uweíriguni lun Búngiu lun sun dan! Ítaralá.

12

Ibágari le derégewati lun Búngiu

¹ Amúriajatina lubeíti júma, nidújeñu, lun jedéregerapun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadügüni lugúndun weírini lareíni woun. ² Jebé jabágaridun queísi lirájüñü ubou le, lubáragiñe líra, sáansi jumeí ligáburu jisáminan, sáansi lámuga gíñe ligáburu jabágaridun. Ítara lúba jiábin lun jasúbudiruni le lugúndaanbei Búngiu jun —le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában

jídaangiñe arítaguti luoúgua weíri sügü láu le ligíabei. Lubáragiñe líra, cáda ában lúnti lasúbudiragun lúngua, según afiñeni le rúlaalíbei Búngiu lun. ⁴Lugúndun ítara quei gíbe lán buri umégeguni luágu ábanrügü úgubu, áni máma ában méme lifísiute sun umégeguni ligía, ⁵ ítara wáña gíñe, wagía afiñetiña, láu sun gíbe wamá, ában rügüñadiwa úgubu lídan ában lúma Crístu, áni íderaguatiwa woúngua wádaangua queísi lumégegún ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadügüni según afiñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸ Le gíchigaditi dügüdaguaü joun ámu, lúnti líchaagun lúngua lun ladügüni. Le edéweejati, lúnti magúrabun lan láguyun lun, le ábutíbei, lúnti lagúmadijan láu sarágu duári, le íderaguti gudémetiña, lúnti ladügüni láu ugúndani.

Ligáburi jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ínsiñeni le inárúnti. Iyéreegulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jiñúragüdüni jíri jidújeñu.

11 Mamágualigu jumá lídan luwádigimari Wabúreme, seríwi jumeí táu sun janígi.

12 Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

13 Íderagua jumáña afíñetiña lídan jemégeirun, resíbi jumáña ja bisídabalün láu ugúndani.

14 Amúriaja jumá labínirun Búngiu jawágun ja ouserutün wuríba, amúriaja jumá abíniruni joun, máma wuríbani.

15 Gúnda jumá jáma ja gúndaabaña, jayájua jáma ja ayájubaña.

16 Abágarida jumá lídan úaraguni júmawagua. Manángua jumá júngua, gamádagua jumá jáma ja gudémebaña. Marítagua jumá juougua queísi sábiugu.

17 Mafáyeira jumá wuríbani luágu wuríbani lun ni ában. Áfaagua jumá lun jadügüni le búidubei jagíbugiñe súngubei. 18 Adüga jumeí sun le juáraati lun jabágaridun lídan dan jáma súngubei. 19 Nidújeñu jínsiñetiña nun, máguyugüda jumeí wuríbani, ígira jumeí lun Búngiu lan afáyeigüda luágu. Taríñajare Lerérun Búngiu.

“Áu lúnbei nafáyeigüdüniña gürígia luágu jaríban, líña Jabúreme.” 20 Aríñagati giñe Búngiu. “Ánjein lamá lubeí bágani, rúba eígini lun, ánjein mágürabu lubeí, rúba dúna lun, lugúndun láu badügüni líra, lebéloruba busíganu lun luágu luríban louserunibu.”

21 Mígiraguagüdebá búngua lun lagáñeirunibu wuríbani lun báguyugüdün wuríbani luágu wuríbani, lubáragiñe líra, gáñibeí wuríbani láu buídu le badügübei.

13

¹ Lúnti jíchaagun súngubei júngua lábun jalúrudun gumádimatiña, lugúndun ítara líña laráansejan Búngiu lun ñíbei lan lúrudu, áni gumádimatiña ja lídaanbaña jabára, labúseerun Búngiu añájein lubeí ñi. ² Gürígia lubeíti le awügüríjoúti lun gumádi, múaraanti láu le laríñagubei Búngiu, áni ja awügüríjoútiña ítara, gadúnruntiña luágu líra áni jafáyeiruba luágu. ³ Mára lúnñanu jíchugun gumádimatiña anúfudei joun ja adügübalin le buídubei, aná joun ja adügübalin le wuríbabei. ¿Buséntibu babágaridun manúfudeiga lueí lúrudu? Buídulá bouuserun, ábame buídu ban lurúma lúrudu, ⁴ lugúndun lesériwiduña lun Búngiu luágu bufúleisein. Ánjein wuríba bouuserun, lúnti janúfude ban, ladüga máma luágu ni cáta gabáfu lan lúrudu lun lafáyeijagüdün luágu dúru, quei lesériwiduña lubeí lun Búngiu lun lafáyeijagüdün luágu dúru. ⁵ Ligía lúnti lubeí úaragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítapun. ⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cátei líbe líra, fáyei jumeí le lúnti jafáyeiruni luágu cátei le ñübinbei jun bougudigiñe lueí jageíra. Gagáambadi jumá joun gumádimatiña, ru jugúyame inébesi joun queísi lubúdubu. ⁸ Máni jumá dúweiti ni ca úma, lueídügüya lidúweitina ínsiñeni le jadúweirubei júmagua. Le jínsiñejabuti

lun gürígia líledi, adüga láali sun le lubeíbei lilúrudun Búngiu láu ladügüni líra. ⁹ Tariñajare Lerérun Búngiu. “Magámaridabá gürígia maríetiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bínsiñegua búngua.” ¹⁰ Le jínsiñejabúbei, madügünti wuríbati lun ni ában, ánjava lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburi wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatimaajali óra lun lagíribudun Wasálbaragüle ubouágun sügü láu dán meja le wafíñerunbei luágu ugánu luáguti asálbaruni. ¹² Belújali áriebu buídu, yaráfaali larúgadun, ligía lúnti lubeí wígiruni wadügüni cátei wuríbati le adügübei lábugiñe lubúriga, lun wadáürunun wadáüragun queísi súdaara ja lábugiñetiña larúgounga. ¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburi lun jarámudagun lueí jaríjin gürígia. Mabágarida wamá lídan bacháruaü, lúma buri lanárime fédu, ni lídan salúfuri lúma iwíyeni, ni lídan gáganiguaü lúma gimúgaü. ¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagübüri ayúmajani.

14

Madímurejabá luágu bidúje lueígiñe Jesucrístu

1 Ánjein débili lubeí ában gürígia lídan lafiñen, resíbi jumeí, mariñagunga ni cáta lun luágu cátei le machoúrunei luágu. 2 Queí buri, añájein derégüdati jafiñen, jarítaguatiña luágu gayára lan jeígin afiñetiña furúmieguaügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jafiñen, meígintiña úwi. 3 Le eígiti furúmieguaügü cátei, moún lumuti únabu lan lanügüni le meíginbalin, le gíñe májabei leígin furúmieguaügü cátei, moún lumuti gíñe ladímurejan luágu le eígibalin, lugúndun resíbi láali Búngiu gürígia ligía queísi lánigu. 4 ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdüni buídu.

5 Nijánya ában jémpulu. Añájein gürígia weíriti janügüni ában wéyu lueí ámu wéyu, añájein jíbiri, afiñetiña luágu ában lan lábu sun wéyu. Cáda ában lúnti lachoúruruni le uágubei larítagua. 6 Le areídubei som wéyu, ladügüñein lun líchugun inébesei lun Búngiu. Le eígibeí furúmieguaügü cátei, leígini lun líchugun inébesei lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladüga liloúguan lafiñen, lun líchugun inébesei lun Búngiu ladügei, rúti gíñe eteíngiruni lun Búngiu luágu cátei le gayáraabei leígin según lafiñen.

7 Nariñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü. 8 Ánjawa abágarida, wabágariduña lun wadügüni lugúndan Búngiu,

ánjawa oúwe, wounweña según lugúndan Búngiu. Ítara líña lubeíti, dándu lídan ibágari queísi lídan oúweni, láni Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdün, áni sun wagía, waráramuba ligíbugiñe lun wagúserun, ¹¹ queísi tariñagun Lerérun Búngiu.

Inárüniti ítara quei gabágari nan, líña lariñagun Búngiu, luágu jájuduraguba lan sun gürígia nigíbugiñe,

áni jasúbudirubadina súngubei ligíbugiñe guríriguaü. ¹² Cáda lubeíti ában wádaangiñe, lagúseruba luougua lúma Búngiu.

Machúgeraguagüdadeí bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítangun lun madügün jumá ni cáta le gayáraati lachúgeraguagüdüni jíbiri, o láburugüdüni lan lídoun figou. ¹⁴ Subúdi numúti luágu úa lan ni cáta le leígibe gürígia lun lawíyeduni ligíbugiñe Búngiu, áni choúru numúti líra, áu queísi afiñeti luágu Jesucrístu. Láu sun líra, ánjein jarítagua lubeí ában gürígia luágu marúman lan ában cátei, marúmaanti lun, áni figou lun lun leígini. ¹⁵ Ánjeinti bañáwuriya lafiñen bidúje láu cátei le beígibe, mámaali bagáburiduña láu ínsiñejabuni. Madúgabá lun leféridirun ában gürígia le ueígiñebe lóuwe Crístu, ladügarügü beígin ítaga cátei. ¹⁶ Míchiga

jumá lubeíti lúgaaru lun ladímurejoún wuríba luágu cátei le gayáraabei jadügüni queísi afíñetiña luágu Crístu. ¹⁷ Larúeijan Búngiu máma cátei luáguti le eigíbei o atúbei, luáguti ában ibágari le lánina Ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buíti gíñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wámagua lun wawáanserun lídan cátei le lánina Búngiu. ²⁰ Magürinchaguabei luwádigimari Búngiu lídan libágari ában gürígia láu cátei le beígíbei. Inárüni luágu jarúma lan sun eígini ligíbugiñe Búngiu, le wuríbabei, lun leigín cátei le áburugüdütiña ámu gürígia lídoun figou. ²¹ Buíti lun meígin ban úwi, matún bínu, madügün ni cáta le achúgeraguagüdüti bidúje, o láburugüdüni lan lídoun figou, o ledébiliragüdüni lan lafíñen. ²² Afíñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei laríñagun luágu buídu lan cátei le ladügübei, masándiragunga ligía lúngua láu dúru! ²³ Ánjeinti le eígíbei ában cátei láu machoúruni luágu buídu lan leígini queísi afíñeti luágu Crístu, gadúnrunti ladüga leigíni, lugúndun meígin lumúti láu afíñeni. Sun le wadügübei, ánjawa arítagua luágu fágua lan moun láani wadügüni, figou woun.

15

Gúndaagüdebá gürígia bíledi, máma amiürü guánarügü

¹ Wagía le jérebei lídan wafíñen, lúnti gagúraasun wamá jabá ja louguagiñabaña afíñe, lúnti warítangun luágu le buídubei joun, mámarügü luágu wíchugun ugúndani woúniwagua. ² Cáda ában wádaangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni lafíñen. ³ Ni Crístu, míchugunti ugúndani lúniwagua, lubáragiñe líra, suséreti le abürüjóubei tídan Lerérun Búngiu lun. “Núguchi, áburujati janábajan ja anábubalibu nuágun.” ⁴ Sun le aríñawagúbei tídan Lerérun Búngiu lúmagiñe binárü, lun larúfudajoún woun labürüjoúa, bürüwatí meja dimúrei buri ligía lun wanügün gurásu lúma dügüdaguaü lídaangiñe, gayára lámuga weménigiduntima luágu Búngiu. ⁵ Búngiu le íchugubei gurásu lúma dügüdaguaü, íderagualaún lun jabágaridun lídan dan jáma jíbirigu, queisi ladügüni Jesucrístu. ⁶ Ítara lúba, sun lan wagía lídan ában, láu ábanrügü umálali, wíchuguba uweíriguni lun Búngiu, le Lúguchi Wabúreme Jesucrístu.

*Agáambatiña ja mámabaña juríu luágu
Wasálbaragüle*

⁷ Resíbigua jumá lubeíti júniwagua quei gíñe lerésibiruníwa Crístu, lun liñurúniwa líri Búngiu. ⁸ Le naríñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugúbei joun binádu wagübürigu, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan ja mámabaña juríu uweíriguni lun Búngiu luágu lareídun, quei tariñaguni Lerérun Búngiu.

Ligía níchuguba lubeí uweíriguni bun jagánaguagiñe
ja mámabaña juríu,
nerémujaba gíñe luágu buweírigun.

¹⁰ Taríñajare gíñe Lerérun Búngiu.

Gúnda jumá, jugúya le mámabei juríu, úara jáma ja
lánigubaña Búngiu.

¹¹ Taríñajare gíñe.

Rújuma sun ja mámabaña juríu inébesi lun Búngiu,
adímureja jamá sun gürígia luágu luweírigun.

¹² Laríñajare gíñe Isaías tídan Lerérun Búngiu.

Liábiba ában ladügawagun Isaí,
le lúnbei lagúmadiruniña ja mámabaña juríu.
Jagía, jeménigiduba luágu.

¹³ Búngiu, le íchugubalin eménigini woun,
buíngüdalaün láu ugúndani lúma darángilaü lídan
jafíñerun luágu, lun buíñu jumá láu eménigini, láu
lubáfu Sífiri Sándu.

¹⁴ Nidújeñu, chouúruguatina núngua luágu
buin jíña lan láu areíduni lúma subúdi luágu
wafíñen luágu Crístu, luágu gíñe gíchigadi jumá
dimúrei buíti joun jíbirigu. ¹⁵ Tídan gárada to,
abürüjaadina jun láu sun furáangu luágu buri cátei
le lun mabúlieidun jumáni. Nadügüñein luágu
wadágimanu le rúlaalíbei Búngiu nun láu lareíni,
¹⁶ lun nesériwidun lun Jesucrístu jagánagua ja
mámabaña juríu. Seríwi le nadügübei, napúrichijani
ugánu lúmagiñeti Búngiu luágu Wasálbaragüle lun
nanügübaña lan ja mámabaña juríu lun Búngiu, lun
lerésibiruniña queísi gürígia ja jarúmaaru janígi láu
luwádígimaridun Sífiri Sándu jádan.

¹⁷ Ítara líña lubeíti, áu queísi ában afíñeti luágu
Jesucrístu, gébunati gúnda nan lídan nesériwidun lun

Búngiu, ¹⁸ luágu rügüñein buri cátei le ladügübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun, ¹⁹ luweírin buri seíni lúma buri miláguru le nadügübei láu lubáfu Sífiri Sándu nídan, lun lanügüniña ja mámabaña juríu lúmoun. Láu igáburi le, jóustagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe darí loubawagun Ilírico. ²⁰ Ítara líña áfaaguaadina lan lun napúrichijani ugánu luáguti Wasálbaragüle le ñí lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ñí lumuti chülújali lan ámu láu ugánu luágu, nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le tariñagubei Lerérun Búngiu. Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladüga nesériwiduña lan lun Crístu lídan ámu fulásu, siñágili lubeí nídin bisídaün, láu sun gíbeeli lan weíyaasu nabúseerun nadügüni. ²³ Guetóti, quei gumúnaali lan nuwádigimari lueígiñe oúbaü le, áni quei lúmagiñe lan binárü nabúseera nídin aríjaün, ²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ánjein guetó, neíbuga Jerusalén, barüína cátei joun wadújeñu lueígiñe Jesucrístu ñi. ²⁶ Lugúndun wadújeñu ja Macedóniabaña

jáma ja Acáyabaña jarítaguaaña joúndarun seínsu jádaangua lun joúnajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadügüni cátei le, áni richátiña, lugúndun dúwei jamúti joun le tímatimaati, lugúndun ítara quei jafánreinraguni afiñetiña ja juríu jarísin le lánina siélu jáma ja mámabaña juríu, lúnti giñeti jíderaguniña afiñetiña ja mámabaña juríu afiñetiña ja juríu luágu jemégeirun ya ubouágu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naünme dánme le násügürün. ²⁹ Choúru numúti luágu dan lánme nachülürün júmoun, nachülürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jaweí mafiñetiña ja Judéabaña, lun giñe buídu lan lerésibirúniwa íderawaguni le nanügübei joun wadújeñu ja Jerusalénbaña, ³² lun gúndaabadina lan dánme le nachülürün júmoun eméraagua murúsun, ánjein ligía lubeí lugúndaabei Búngiu. ³³ Júmalá Búngiu le íchugubei darángilaü. Ítaralá.

16

Mábugaü lun cáda ában

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencréaboun, jun. ² Dánme le tachülürün júmoun, resíbi jumoún buídu lídan líri Wabúreme,

queísi lúnti lan ladügün jádan idújeñu lídan afíñeni. Íderagua jumouñme lídan furúmieguarügü cátei le temégeirun, lugúndun tugúya, sarágujaña tíderagun, íderagua táadina gíñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu. ⁴ Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun gíñe wadújeñu ja tílana jalígilisin ja mámabaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei afíñeruti luágu Crístu ubúrugú Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómána. ⁷ Mábuga níña joun nupaísanu Andrónico lúma Junías já meja níbirigubaña furísunrugú, buíti jadímurejan láni Crístu apóstolugu jawágu, jagía gíñe afíñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, wouba lídan wawádigimari luágu Jesucrístu, lúma lun Estáquis, numáda le jínsiñebei nun. ¹⁰ Mábuga níña lun Apéles, le arúfuda láalibei lafíñen luágu Crístu sarágu weíyaasu, mábuga níña gíñe joun tílana lúban Aristóbulo. ¹¹ Mábuga níña lun nupaísanu Herodión lúma joun tílana lúban Narcíso ja afíñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adügaaruboun

sarágu lídan líri Crístu. ¹³ Mábuga níña lun Rúfo, wügüri le buídubei igáburi le tímatimaati ligíbugiñe Crístu, mábuga níña giñe tun lúguchu, to giñe ítarajaruboun quei ában úguchuru nun.

¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña.

¹⁵ Mábuga níña giñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tilana lilígilisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdúbaña gürígia, ru jagía achúgeraguágülei lun jafiñen. Múaraanti le jadügübei lúma le arúfudajoúbei jun. Díse jumá jaweí gürígia jagía, ¹⁸ lugúndun gürígia jagía, mesériwiduntiña lun Wabúreme Jesucrístu, jóungua guánarügü jesériwida. Jeyédañati gürígia ja únabugutiña láu buri liñúlun lúma lubuidun lagaambún jerérun. ¹⁹ Subúdi jamúti sun gürígia luágu ñüdüñ jumá láu le lubeíbei Búngiu, ligía gúnda nubeí, buséntina giñe lun furése jumá lun jadügüni le buídubei, máma lun le wuríbabei. ²⁰ Búngiu le íchugubalin darángilaü, lagáñeiragüdúbadün luágu Máfia, furése. Binilaün Wabúreme Jesucrístu.

²¹ Mábuga líña Timotéo jun, le nouba lídan wadágimanu, mábuga jaña giñe Lúcio, Jasón lúma Sosípater, ja nupaísanu, jun.

²² (Áu, Tércio, le abürüjabarun gárada to, mábuga níña giñe jun, nidújeñu lueígiñe Wabúreme.)

²³ Mábuga líña Gáyo jun. Naganouña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdajabalin liseínsun fulásu, lúma gíñe wadúje Cuaróto.

²⁴ Binílaün Wabúreme Jesucrístu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesei lun Búngiu, le gayáraabei ladügünün lúntima derégüdagu jumá lídan jafíñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun ubou, láu sun abúrüja jamá meja profétagu luágu.

²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafíñerun luágu, gagáambadi jagíame lun Búngiu.

²⁷ ¡Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucrístu, lun sun dan! Ítaralá.

Lerérún Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022
df8e4807-f4f9-5f4a-ab14-d1f7ffe98b0a